

Տ. ՎՐԹԱՆԵՍ ԵՊԻՍԿՈՊՈՍ ԱՔՐԱՅԱՄՅԱՆԻ ՔԱՐՈԶԸ՝
ԽՈՍՎԱԾ ՎԱՂԱՐՇԱՊԱՏԻ Ս. ՍԱՐԻԱՍ ԱՍՏՎԱԾԱԾԻՆ ԵԿԵՂԵՑՈՒՄ
ՄԱՏՈՒՅՎԱԾ Ս. ՊԱՏԱՐԱԳԻՆ

(25 դեկտեմբերի 2023 թ.)

Յանուս Հօր եւ Որդոյ եւ Հոգւոյն Սրբոյ. ամէն:

Սիրելիներ, Եկեղեցին այսօր ցնծության մեջ է, որովհետեւ տոնն է մեզ համար շատ սիրելի ու ընկալելի մի սրբի՝ Սուրբ Ստեփանոս Նախավկայի, առաջին սարկավագի եւ նահատակի: Սուրբ Ստեփանոսն առաջին վկան էր Քրիստոսի, որը տեսավ եւ վկայեց, որ երկինքը բացվել է իր առջեւ, եւ Տերը նստած է Հոր աջ կողմը. այս վկայությունն է, որ հայհույություն համարեցին հրեաները եւ նրան քարկոծելով՝ սպանեցին, որով եւ նա դարձավ Քրիստոսի առաջին նահատակ վկան: Քրիստոսի անխոնջ վկան՝ Սուրբ Ստեփանոսը, դարեր շարունակ եղել է մեր ժողովրդի համար նշանավոր մի սուրբ, եւ նրա անունով կառուցվել են բազմաթիվ վանքեր ու եկեղեցիներ:

Եւ այսօր՝ դեկտեմբեր 25-ին, հավաքվել ենք Արմավիրի թեմի Սուրբ Աստվածածին այս եկեղեցում՝ տոնախմբելու հրաշալի սրբի տոնը եւ մեր մեղքերի թողության ու մեր հայրենիքի, պետականության զորացման համար խնդրելու նրա բարեխոսությունը: Համաձայն Եկեղեցու ծոցում ձեւավորված ավանդության՝ այսօրը նշվում է նաեւ որպես սարկավագների տոն: Տոնի խորհուրդն ու օրհնությունն ավելի ամբողջական է դարձնում Մայր Աթոռ Սուրբ Էջմիածնից Ամենայն Հայոց Կաթողիկոսի օրհնությամբ եւ տնօրինությամբ այստեղ բերված Սուրբ Ստեփանոսի մասունքակիր աջը, որի օրհնաբեր ներկայությամբ պիտի կարողանանք պատշաճ կերպով կատարել այն ամենը, ինչ որ մեր խնդրանքն է Աստծուն, որպեսզի ձեռնադրությունը, որ տրված է որպես շնորհ եպիսկոպոսին, փոխանցվի նորընծա սարկավագներին: Մասունքակիր այս աջն այստեղ է, որպեսզի նաեւ մեր հավատացյալները, դիպչելով նրան, ստա-

նան այն օրհնությունն ու ջերմությունը, որ դարերի խորքից փոխանցվում են մեզ:

Հայ Առաքելական Եկեղեցին ոչ միայն պատշաճորեն տոնախմբում է համաքրիստոնեական նշանակություն ունեցող այս սրբի տոնը, այլև օրվա խորհրդին համահունչ ու ներդաշնակ կերպով տոնին միախառնում է գեղեցիկ մի արարողություն՝ սարկավագական ձեռնադրության հիասթափարկող: Այս գեղեցիկ օրով եւ մեզ ընձեռված առիթով մենք մեր զնահատանքն ու շնորհակալությունն ենք հայտնում բոլոր այն անձանց, որոնք պատրաստել եւ կրթել են մեր սաներին, որպեսզի նրանք հասնեն այս հոգեւոր աստիճանին: Այդ երախտավորներն են ճեմարանի տեսուչները, դասախոսները, նաեւ նրանք, ովքեր մշտապես կանգնած են եղել մեր սպասավորների կողքին, որպեսզի նրանք կարողանան ոտք դնել այս քաղցր շեմին եւ այսօր ի հոգեւոր արժանանան աստվածային եւ երկնային շնորհներին: Այն տեսանելի աստիճանները, որոնցով նրանք բարձրացան Սուրբ Սեղան, նրանց համար պետք է դառնան հոգեւոր անտեսանելի աստիճաններ՝ հասնելու համար այս Սուրբ Սեղանին, որտեղից պետք է կերակրեն մեր հավատացյալներին Քրիստոսի Մարմնով ու Արյունով:

Ահա այս կապակցությամբ նախ եւ առաջ շնորհավորում ենք Ամենայն Հայոց Կաթողիկոսին, որի տնօրինությամբ եւ օրհնությամբ եւ համապատասխան քննական շրջանը հաղթահարելով՝ մեր սաները հասան այս կարեւոր աստիճանին: Շնորհավորում ենք նաեւ լուսարապետությանը, նաեւ բոլոր նրանց, ովքեր աշխատել եւ ջանքեր են գործադրել այս գործում: Մեր եղբայրական ջերմ ողջույններն ենք փոխանցում նաեւ թեմական առաջնորդին, որի թույլտվությամբ այսօր տեղի ունեցան այս գեղեցիկ պատարագը եւ ձեռնադրության կարգը:

Շնորհավորում եմ ամենքիս, շնորհավորում եմ ծնողներին եւ հարազատներին: Այս զգացումները, որ սարկավագներն ապրեցին այստեղ, նուրբ թելերով կապում են նրանց իրենց ծնողների եւ հարազատների հետ: Եւ սա է, որ կոչվում է հոգեւոր ջերմություն, զավակների եւ ծնողների, զավակների եւ հավատացյալների, սպասավորի եւ հավատացյալ ժողովրդի միջեւ:

Մենք շնորհավորում ենք Դավիթին, Հարությունին, Արսենին, Սերգեյին, Յուրիին, Արամայիսին, Արմանին, մյուս Դավիթին, Սարգսին, Գուրգենին եւ մյուս Արմանին, որ հասան այս հոգեւոր բարձր աստիճանին

եւ ստացան նոր մի անուն՝ բարեշնորհ սարկավագ: Այդ բարի շնորհներն են, որ իջել են նրանց վրա աստվածային եւ երկնային ուժի միջոցով: Այս շնորհներն են, որ մարդուն դարձնում են անվախ, դարձնում են քաջ, դարձնում են նվիրյալ սպասավոր Հայ Եկեղեցու: Եւ անգամ մեր նորագույն պատմության մեջ քիչ չեն այնպիսի սարկավագները, որ նմանվել են Սուրբ Ստեփանոսին, դարձել են նահատակ մեր ազգի եւ Եկեղեցու համար՝ Ռաֆիկ սարկավագը, Արմեն սարկավագը, Նարեկ սարկավագը եւ մյուս սարկավագները, որ իրապես իրենց կյանքը, առանց մտածելու, նվիրեցին մեր հայրենիքին, մեր Եկեղեցուն եւ մինչեւ վերջ հավատարիմ եղան իրենց կոչմանն ու քրիստոնեական արժանապատվությանը:

Ուստի, սիրելիներ, ուզում եմ նախ եւ առաջ բոլորս աղոթք բարձրացնենք մեր նահատակ սարկավագների՝ որպես մեր նորագույն պատմության ստեփանոսների հիշատակի համար, եւ խնդրենք բարեխոսությունը Սուրբ Ստեփանոսի, որ մեր նորընծա սարկավագները նույնպես միեւնույն քաջասրտությամբ, միեւնույն անվախությամբ սպասավորը լինեն Հայ Եկեղեցու եւ մեր ժողովրդի: Այս առումով է, որ մենք գալիս ենք եւս մեկ անգամ շնորհավորելու եւ բարին մաղթելու մեր սարկավագներին, որպեսզի, ինչպես Սուրբ Սեդանի վրա ձեռքերը վերեւ բարձրացրած եւ շարականի ներդաշնակ երգեցողության տակ լսեցին իրենց ուղղված այն խոսքը, թե՛ արժանի են, իրապես արժանանան մեր Եկեղեցու սպասավորները եւ անմնացորդ նվիրյալները լինելու բարձր պատվին:

Թող Տերն օրհնելով օրհնի ամենքիս, մեր երկիրը, մեր պետականությունը եւ մեր Եկեղեցին այժմ եւ միշտ, հավիտյանս հավիտենից, ամեն:

